

Ya'a tse'e je nak juu' ve'e je Judas jyaay

¹Atse'e je Judas, je Jesucristo je myutoompa je myupajkpa, je Santiago je y'uts. Máyam atse'e je Dios ntuknukexta je jayu juu' ve'e je Dios Tee' vinkoojnjudu jetse'e chojkjidi, je Dios Tee', juu' ve'e íxjudup jayejudup je'e kajx ku ve'e to'k muk y'litta je Jesucristo maat. ²Ooy tse'e xtunjayéptat je tukmo'tun, je oy joot, jets je tsojkun.

Je yak'ixpajkpada juu' ve'e taayidup
(2 Pedro 2.1-17)

³Miitsta, juu' atse'e ooy ntuntsojktup, njatsojk xa atse'e jets ats miitse'e kunnuja'yidi je joojntykin kajx juu' ve'e xa'ma kajx ijtp jetse'e njayejpumda, ax ka'anumts atse'e ve'em ntun. Nnaya'vijupts atse'e jets too'vajkp ats miitse'e nkojtsmákkadat jetse'e to'k aaj to'k joot mnaajk'ijtidinit je ayook maat juu' ve'e mjaanchja'vidup jetse'e je Nte'yam to'k naxji dutukkatajki je jyáyuda. Ax ka'ats je'e ve'e duyaktikutsut je ayook juu' ve'e yaktaan. ⁴Jem xa ve'e je jayu juu' ve'e je vin'aa'nun kajx napyajmjudup je jaanchja'vivatajk maat, ax ka'ats je'e ve'e dunatyukpájkada

je Jesucristo, je'ejyji ve'e to'k je nMaja Vintsánamda. Jujpani tse'e je Kunuu'kx Jatyán du'ava'ni jets vintókidap je'e ve'eda, ka'a tse'e je Nte'yam duvintsa'agada. Tyijtufts je'e ve'e jets je'e kajxe'e kuxe'e je Nte'yam je jayu je maa'yun dutuujnja, nvaat tse'e je yaa'y je ta'ax je kats dutukmaatjayéptat juu' ve'e ka púkap jyayejptup.

⁵Oyam miitse'e xnújávada juu' ats miitse'e ntuknuja'yidup, ntsajkpts atse'e jets ats miitse'e ntukjaa'myéttat jets je Maja Vintsane'e duyakpítsumni je jyayu jem Egipto. Oyam tse'e vye'ema, ux'ookts je'e ve'e duyakkutókidini je'eda pan pan jatye'e kajaanchja'vijidu. ⁶Jaa'myéttsta je angelestajk juu' ve'e kayakkutojktu ax jo'n je Nte'yam tyukkatajkijidi, myasooktinuts je'e ve'e je it juu' ve'e jyayejptu, je Nte'yam tse'e yak'ijtjudup jem akoo'ts it jootm juu' ve'e dunu'ava'tikajxp. Ve'emts je'e ve'eda ax jo'n je poxuntakjayu juu' ve'e cadena tsum. Jem tse'e ve'em y'ijttinit je xaaj paat ku ve'e je tsaachpaatun yakmooydinit. ⁷Jaa'myegtstuva je sodómaít jets je gomoorrait jáyuda jets je jayu juu' ve'e tsuunidup y'ijit

jem kajpun kajxmda juu' ve'e mutámijidup, ka'a tse'e je Nte'yam dukatsupajktuva, tyukmaatjayejptu tse'e je kats je yaa'y je ta'ax juu' ve'e ka púkap jyayejptu. Je'e paat tse'e ko'otyoondu ku ve'e je yaa'tyajk je kats dutukmaatjayejpti je myuyaa'tyajk. Je'e kajx tse'e je Nte'yam yakkutokikajxjidini ku ve'e je jaajn duyaknaxkadaaky. Ve'em tse'e dutuujn jetse'e anañjoma je jayu va'ajts dunújavadat jetse'e ve'em dukatoonduvat.

⁸Ax nay ve'empa je jayu juu' ve'e napyaa'jmjudup je jaanchja'vivatajk maat, vaandupts je'e ve'e jets ti jatye'e yak'ixjudu je kuma'aj kajx jetse'e ve'em dutóndat je ka óyap juu' ve'e tyonuvaandup je y'avintso vinma'yun kajxta. Ka'a tse'e dumajapamda je kutojkun juu' ve'e je Nte'yam jyayejpp, vyinkojtspejtup tse'e pan pan jatye'e ijttup jem tsapjootm.

⁹Ax je ángeles Miguel, juu' ve'e dunvintsanikajxp je aangelestajkta, ku ve'e dumaatnakyojtsvintsoojvji je Satanás jets pane'e dujayéup je Moisés je ñi'kx je kyopk, ka'ats je'e ve'e ñayja'viji jetse'e duvinkojtspétut je ko'oyjáyuvap. Jidu'ume'e vyaajñ: “iJe Maja Vintsán tse'e mtukna'muxjup!”

¹⁰Ax je jayu juu' ve'e vin'aa'ndup, je'ets je'e ve'e ky'o'ñukojtsidup juu' ve'e kyavinmótudup, ve'em xa je'e ve'eda ax jo'n je tánuk juu' ve'e duka'oypayo'ydup juu', je'e tse'e tyoondup juu' ve'e chojktup je y'avintso vinma'yun kajxta. Vintókidapts je'e ve'eda.

¹¹iAyoov xa ve'e je'e je jyootta, kux je'e ve'e dupanajxtup je too'

juu' ve'e je Caín pyajk! Ve'em ax jo'n je Balaam ñatyukkatajkiji je ky'o'oy je'e jetse'e ve'em kumyeempujk, nay ve'empa tse'e jyátkiduva. Vintókidapts je'e ve'eda kuxe'e je Nte'yam dukakatsapakta, ve'em ax jo'n je Coré kyakatsupajkji jetse'e vyintókini. ¹²Ku ve'e mnay'amókajada kaayva je tsojkun kajx juu' ve'e mnayjayejpuxjudup to'k jado'k, je jayu tse'e jomvaandup tivaandup ku ve'e xmaatkáyda xmaat'oo'kta ax jo'n kuxtukmaatjayejpti je tsojkun. Ve'em tse'e oy ñaajkkáyjada, ax ka'a tse'e duyakvinkópkada je jayu juu' ve'e katih'ijtxjudup. Ve'em tse'e y'itta ax jo'n je kup juu' ve'e kata'mip, ax jo'n je kup juu' ve'e yakvixp je y'aa'ts maat jetse'e tyaatsni. ¹³Ve'em ax jo'n je maaxy naaj ooy tyumpojtuk jetse'e je y'aa'pk dupum, nay ve'em tse'e yaknujava vintso ve'e je jayu je jyáyuvinda je ka óyap kajx juu' ve'e tyoondup kyojtstup. Ve'em xa je'e ve'eda ax jo'n je maatsa juu' ve'e too'tókidup, yaknupaajmtkiduts je'e ve'e jetse'e xa'ma kajx y'ijttinit jem akoo'ts it jootm juu' ve'e dunukoo'tsikajxp.

¹⁴Kyojtsnajx xa je'e ve'e je Nte'yam je y'ayook je Enoc juu' ve'e movuxtojtuk naske'exa ku ve'e je Adán kujx yakmachovutsaa'n. Je'e tse'e du'ava'ni vintso ya'a ve'e ya jáyuda. Jidu'um tse'e vyaajñ: “Myaatmínup xa ve'e je Maja Vintsán pan pan jatye'e jye'eip ka jamachávum, ¹⁵je'e tse'e nujom je jayu dutokimpayo'kyajxtinup, pyaajmjidinupts je'e ve'e je tsachpaatun nujom pan pan jatye'e

je Nte'yam dukajaanchja'vidu jetse'e dukavintsá'kidi, jetse'e dUVinkojtspejtti, jetse'e je kyo'oy je'e dutoondi." Jidu'um tse'e je Enoc vyaajñ. ¹⁶Ka'a tse'e je jayu juu' dutukjotkada'akta, kyo'oyja'vidupe'e juu' jatye'e je viijnk jayu tyoondup, pyanajxtup tse'e je kyo'oy je'e juu' ve'e chojktup je y'avintsó vinma'yun kajxta, namyájjidup tse'e, y'ixtidupts je'e ve'e vintsó ve'e je jayu tsoj dujávadat juu' ve'e tuk'ixjudup jetse'e ve'em dujayéptat juu' ve'e chojktup.

Juu' ve'e tyóndap je jaanchja'vivatajktá

¹⁷Miitsta, juu' atse'e ooy ntuntsojktup, jaa'myé'tsta je ayook juu' ve'e je nMaja Vintsánamda Jesucristo je kyukátsivada myakta'nuxjudu. ¹⁸Ve'em tse'e vyaandi jets ku ve'e támani je itakax vye'nat, tyukxi'iktupts je'e ve'e je jayu je Nte'yam jye'e, je y'avintsó vinma'yun kajx tse'e dutóndat je ka óyap juu' ve'e chojktup. ¹⁹Ax je jáyuda, je'e tse'e je njáyuvamda duyaknapyajvák xuvaajnjudup, chojktupts je'e ve'e jetse'e je njáyuvam y'ijttinit to'k je vinma'yun je'e maat, je'ejyji tse'e tyoondup vintsó ve'e je kyo'oy vinma'yun ñá'muxjada, ka'a tse'e jem jya'vin kajxmda y'it je Espíritu Santo.

²⁰Miitsta, juu' atse'e ooy ntuntsojktup, ijtp tse'e mnaajkmákkpájkjadat je mva'ajts

jaanchja'vin kajxta. Tsapkotsta je mákkin maat juu' ve'e je Espíritu Santo yajkyp. ²¹Naajk'ítjada je Nte'yam je chojkun maat ku ve'e x'a'ixta je xaaj ku ve'e myiinnuvat je nMaja Vintsánamda Jesucristo, je'e juu' ve'e je ñu'ixkadaakun kajx mmoojyjidinup je joojntykin juu' ve'e xa'ma kajx ijtp.

²²Tukmo'otta pan pan jatye'e mejtsvinmaaydup. ²³Putákada tse'e viijnkta, ve'em ax jo'n je jayu kuyakputaka juu' ve'e jem janjootm yakvaa'mpítsump, jets tukmo'ttuva juu' ve'e viijnktava. Ax nay'ixjada tse'e jets ka'a ve'e ve'em xtóndat ax jo'n je'e ve'e dutonda, ko'oyjávada tse'e je kyo'oy je'e juu' ve'e tyoondup, jets tsa'agada kux ku ve'e mpaa'tjadat je kyo'oy je'e juu' ve'e tyoondup.

Ku je Judas kyojtskukajxini

²⁴Ax je tun to'k Nte'yam, je nYaktsookpamda, o'yixjup xa je'e ve'e jetse'e dutónut vintsó ve'e mkaka'adat jep tokin jaatp jetse'e myakje'yjidinit jem je'e vyinkojkm joma ve'e ooy je majin dutunjayep, ve'em vintsó ve'e je tokin mkapaa'tjadat jets ooy je xoojntkun maat, ²⁵je'e tse'e dujajejpnup je nMaja Vintsánamda Jesucristo kajx je vintsá'kin jets je majin, je mákkin jets je kutojkun. Ve'em tse'e y'ijit ka'anume'e ya it choo'nduk vye'na, uxyme'e ve'em y'ijtpa, jetse'e xa'ma kajx ve'em y'ijtnit. Amén.